

Tasiilami ingerlariaqqilluni ilinniarfissamik tunumiut oqaasii, kulturiat oqaluttuarisaanerallu aallaavigalugit pilersitsinissamut periarfissanik Naalakkersuisut misissueqqullugit peqquneqarnissaannik Inatsisartut aalajangigassaattut siunnersuut.
(Inatsisartunut ilaasortaq Gerth Mikaelson, Naleraq)

Nunatta kangianut tulluarsakkamik ilinniarfimmik, Tasiilami inissinneqartussamik pilersitsinissaq pillugu Naalakkersuisut siunnersuusiornissamik peqquneqarnissaannik Inatsisartut aalangiiffigissaattut siunnersuut. Ilinniarfik assigiinngisitaartumik ilinniarfiullunilu piginnaasaqalerfiunissaa tunngavigneqassaaq. Siunnersuut UPA2027-mi saqqummiunneqassaaq.
Inatsisartunut ilaasortaq Nivi Rosing, Inuit Ataqatigiit

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarneri

Inatsisartuni ilaasortat Gerth Mikaelson, Naleraq, aamma Nivi Rosing Inuit Ataqatigiit, siunnersuuteqarsimanerini Naalakkersuisut sinnerlugit qujassuteqarfigaakka.

Siunnersuutigineqartut marluullutik Tasiilami ilinniarfimmik pilersitsinissamik siunertaqarput najukkamilu pissutsinik, pisariaqartitanik piginnaasanillu aallaaveqarluni ilinniarnissamik neqerooruteqartalerinissamut ineriartortitsinissaq siunertarineqarluni. Tasiilami Tunumilu ilinniarnissamik periarfissat annertusarneqarlutillu periarfissaalernissaanik kissaateqartoqarnera Naalakkersuisunit eqqumaffigineqarpoq.

Tasiilami ilinnarfiusinnaasunik misissuisoqarnissaanik siunnersuutit Naalakkersuisut isumaqatigaat, ilutigalugulu pilersitsinissaanissamut tunngatillugu aalajangivittoqartinnagu pisariaqartitsinerup tamakkiisumik qulaajaqqissaarnissaa kissaatigalugu, misissuinerullu inerneru UKA2027-mi saqqummiunneqarsinnaanissaat naatsorsuutigineqarluni.

Pisariaqartitsisoqarneranik tamakkiisumik misissueqqissaarnikkut siunissami suliniutissat paasissutissanik eqqortunik tunngaveqarluni Tasiilamilu ilinniartitaanerit sammivissaat, pikkorissartarnissanut pisariaqartitsinerit, sullinniakkat siunniussat aaqqissugaanissaa lu eqqarsaatigalugit pisariaqartitat aallaavigalugit qulakkeerneqarsinnaapput. Ilinniarfissamik ingerlariaqqiffiusinnaasussamik suliffeqarfimmilluunniit siammasinnerusumik ilinniarnissamut pisariaqartitat assigiinngitsut periarfissallu ataatsimoortillugit paasinarneqarnissaat pissusissamisuussasoq Naalakkersuisut suliamut atatillugu isumaqarput.

Pisariaqartitsinerup misissoqqissaarnerani aalangiiffigissat siunnersuutit aallaavigneqassapput, taamaattorli Tasiilami tamakkiisumik siunissarlu ungasinnerusoq isigalugu pisariaqartitat aallaavigalugit aalangiiffigissat siunnersuusiortoqassalluni.

Pisariaqartitsinerup misissoqqissaarnerani makku ilaatigut ersersinniarneqassapput:

- Tasiilami massakkut siunissamilu ilinniagassat neqeroorutigineqartartut
- Ilinniakkanik assigiinngitsunik ilinniartoqarsinnaanissamullu periarfissat pisariaqartitsinerlu
- Ilinniakkat assigiinngitsut naleqquttut qaffasissusissaallu, tassani eqqarsaataallutik inuussutissarsiutinut ingerlaqqiffiusumilu ilinniarnissamut periarfissat

- Tunumiut oqaasiisa, kulturiata najukkanilu ataasiakkaani piginnaangorsarnissamik pisariaqartitsinerisa periarfissarsiuunneqarsinnaaneri
- najukkami ilinniartitsinissamik periarfissaasut saniatigut ungasianiit ilinniartitsisinnaaneri qarasaasi allu atorlugit aaqqiissuteqarsinnaaneri misissornissaat
- periarfissat assigiinngitsut eqqarsaatigalugit aningaasatigut allaffissornikkullu sunniutissat
- ilinniartifioersunik suleqateqarsinnaanissamut periarfissat

Misissueqqissaarnerup tamakkiisup siunissami suliniutaasinnaasut piujuartitsisumik ingerlanneqarnissaat kiisalu najukkami ataasiakkaani naleqqussarnissaanut qulakkeerinnissaat.

UPA 2026/105-mi Tasiilami ingerlariaqqiffiusinnaasumik ilinniarfissamik pilersitsisinnaanermut periarfissanik misissuinissamik UKA2026-milu saqqummiunneqartussamik Naalakkersuisut pisussaaffilerneqarnissaat siunnersuutigineqarpoq. Tasiilami ilinniarfissamik pilersitsisoqarsinnaanera isummerfigineqartinnagu ilinniarnissamik pisariaqartitat atitunerusumik tamakkiinerusumillu misissuiffigineqaaqartariaqartut Naalakkersuisut isumaqarput.

Tamannalu tunngavigalugu aalajangiiffigisassatut siunnersuut UPA2026/105 Naalakkersuisut ilalinngikkaat. Ilutigalugu erseqqissaatigineqassaaq siunertat siunnersuummi siunertarineqartut UPA2026/136-kkut akuersarneqarmata tassungalu atatillugu allannguutissatut siunnersuut.

UPA2026/136-mi siunnersuutigineqarpoq Naalakkersuisut UPA2027-mi saqqummiunneqartussamik Tasilaami ilinniarfimmik pilersitsinissamik siunnersuummik saqqummiussissat. Pilersitsinissamut siunnersuusiortoqartinnagu Naalakkersuisut sukumiisumik aalajangernissamut tunngavissaqartariaqarput.

Taamaattumik Naalakkersuisut UPA2026/136-mut ima allannguutissatut siunnersuummik saqqummiipput: ”Tasiilami ilinniarfimmik pilersitsisinnaanissamut pisariaqartitsineq pillugu nalunaarusiamik UPA2027-mi saqqummiunneqartussamik Naalakkersuisut suliaqarnissamut Inatsisartut aalajangiiffigisassaattut siunnersuut”.